

CONVENIO DE COLABORACIÓN ENTRE A VICEPRESIDENCIA SEGUNDA E CONSELLERÍA DE MEDIO AMBIENTE, TERRITORIO E VIVENDA E O CONCELLO DE BANDE PARA O FINANCIAMENTO DA REDACCIÓN DUN PLAN ESPECIAL DE INFRAESTRUTURAS E DOTACIÓNS NA ZONA TERMAL

REUNIDAS

Dunha parte, Ángeles Vázquez Mejuto, vicepresidenta segunda e conselleira de Medio Ambiente, Territorio e Vivenda, nomeada polo Decreto 66/2023, do 14 de xuño (DOG núm. 113 do 15 de xuño), no exercicio das atribucións que lle confire o artigo 34 da Lei 1/1983, do 22 de febreiro, de normas reguladoras da Xunta e da súa Presidencia.

Doutra parte, Sandra Quintas Vázquez, alcaldesa-presidenta do Concello de Bande, no exercicio das atribucións conferidas no artigo 21 da Lei 7/1985, do 2 de abril, reguladora das bases do réxime local.

Ambas as partes recoñécense mutuamente, na calidade na que interveñen, capacidade legal suficiente para o outorgamento deste convenio e para o efecto,

EXPOÑEN

I. O concello de Bande, no sur da provincia de Ourense, pertence á comarca da Baixa Limia que destaca no seu conxunto polos seus recursos termais e os beneficios das súas augas mineromedicinais.

Dividido en doce parroquias, é na dos Baños onde se atopan os restos do xacemento romano de Aquis Querquennis, ao carón do encoro das Conchas. Coñecidos coloquialmente como A Cidá, este asentamento foi declarado ben de interese cultural no ano 2018 (Decreto 101/2018; DOG 27.09.2018) e dentro do conxunto, ademais do campamento romano e a mansión, destacan as súas termas, visibles segundo se atope o nivel das augas do encoro.

II. Ao norte do conxunto Aquis Querquennis, o 05.07.2022 o Director xeral de Planificación Enerxética e Recursos Naturais, por delegación de competencias do Vicepresidente Primeiro e Conselleiro de Economía, Industria e Innovación, declarou a condición mineiro medicinal e termal das augas procedentes dun punto de captación no



lugar dos Baños con coordenadas UTM (ETRS 89) fuso 29: X: 584.344 e Y: 4.648.005 (DOG 04.08.2022), en terreos de dominio público.

Trátase de augas minerais hipertermais, cunha temperatura media de 45°C, característica física fundamental que, xunto aos seus elementos mineralizantes, determina as súas óptimas indicacións terapéuticas.

Segundo o artigo 3.2 do Decreto 402/1996, do 31 de outubro, polo que se aproba o Regulamento de aproveitamento de augas mineromedicinais, termais e dos establecementos balnearios da Comunidade Autónoma de Galicia dita declaración implica a súa declaración de utilidade pública.

Consonte o artigo 9.1 do mesmo decreto, unha vez efectuada a declaración dispónse do prazo dun ano para solicitara autorización ou concesión administrativa de aproveitamento, segundo o caso e segundo o seu artigo 19º o titular do aproveitamento deberá iniciala explotación no prazo dun ano, contado a partir da data en que as instalacións estean debidamente autorizadas.

III. No antedito marco, e dada a importancia desta zona para o futuro desenvolvemento turístico termal, o 09.09.2022 o Concello de Bande publicou a licitación para convocar un concurso de proxectos, a nivel de anteprojecto, coa finalidade de conseguir a mellor proposta arquitectónica para a construción dun centro termal de nova planta e a posta en valor e o aproveitamento da zona de augas mineromedicinais no lugar dos Baños, a carón do encoro das Conchas.

Nesta licitación o concello contou co apoio da Oficina de Concursos do Colexio Oficial de Galicia co gallo de acadar unha actuación arquitectónica de calidade.

Logo de recibir un total de 65 propostas, no mes de decembro de 2022 o xurado do concurso, formado por profesionais na materia, designou como gañadora á proposta identificada baixo o lema CYCLOPEUS, dos autores Marta Trigás Arias, Xavier Boted Campderrós e Albert Saboya Cabestay, que o Concello de Bande ten interese en desenvolver.

IV. No Concello de Bande están vixentes unhas Normas subsidiarias de planeamento do ano 1987 (BOP 28.04.1987), que clasifican os terreos da proposta como solo non urbanizable de especial protección.



Á vista da disposición transitoria primeira da Lei 2/2016, do 10 de febreiro, do solo de Galicia (en diante LSG), a ditos terreos resúltalles de aplicación o disposto nesta lei para o solo rústico coa categorización de especial protección que proceda (segundo as afeccións sectoriais que constan no Plan básico autonómico de Galicia na data desta memoria: solo rústico de especial protección das augas e do patrimonio cultural).

Atendendo ao réxime de usos definido na LSG para o solo rústico nos seus artigos 35 e 36, as construcións e instalacións para equipamentos e dotacións públicos ou privados (artigo 35.1. letra p)) que se pretenden desenvolver requirirán a aprobación dun plan especial de infraestruturas e dotacións (en diante PEID) (artigo 36.4).

Pola súa banda, o artigo 70.2 da LSG establece que cando o planeamento xeral vixente non conteña as previsións detalladas oportunas, como é o caso, poderán aprobarse plans especiais coa finalidade de protexer ámbitos singulares, rehabilitar e mellorar o medio rural ou establecer infraestruturas e dotacións urbanísticas, sempre que estas determinacións non exixan a previa definición dun modelo territorial.

Afondando nisto, o artigo 73.1 da LSG regula que os PEID teñen por obxecto o establecemento e a ordenación das infraestruturas relativas ao sistema de comunicacións, transportes, espazos libres públicos, equipamento comunitario, instalacións destinadas aos servizos públicos e subministracións de enerxía e abastecemento, evacuación e depuración de augas e a implantación dos usos previstos nos puntos o) e p) do artigo 35.1, de conformidade co disposto no artigo 36.4.

V. Tendo en conta estes condicionantes, o Concello de Bande, mediante escrito do 16 de agosto de 2023, solicitou unha axuda para o financiamento da redacción dun PEID na zona termal.

VI. Acredítase deste xeito que se trata dunha circunstancia singular e sobrevida, que xustifica a tramitación deste convenio, para que o concello afectado poida contar cun instrumento de planeamento que permita a transformación da cualificación urbanística da parcela na que se construírá o futuro equipamento termal no lugar dos Baños.

VII. A finalidade da colaboración constitúe, deste xeito, unha razón de interese público que lle confire un carácter excepcional á axuda, obxecto do convenio. En consecuencia, consonte co artigo 26.2º da Lei 9/2007, do 13 de xuño, de subvencións de Galicia, faise constar que neste convenio non son de aplicación os principios de publicidade e concorrência pública. Isto xustifica, polo seu carácter de excepcionalidade, o procedemento de concesión directa por serlle de aplicación o establecido no artigo 19.4



c) da Lei 9/2007, do 13 de xuño, de subvencións de Galicia e no 36.c) do Decreto 11/2009, do 8 de xaneiro, polo que se aproba o regulamento da citada Lei de subvencións de Galicia.

VIII. A Xunta de Galicia, a través da Vicepresidencia Segunda e Consellería de Medio Ambiente, Territorio e Vivenda, ten atribuídas competencias específicas en materia de urbanismo que exerce a Dirección Xeral de Ordenación do Territorio e Urbanismo, ao abeiro do disposto no artigo 13 do Decreto 42/2019, do 28 de marzo (DOG núm. 79 do 25 de abril), polo que se establece a súa estrutura orgánica, entre as que se atopan, a tramitación administrativa dos instrumentos de planeamento urbanístico e o apoio técnico e económico e a colaboración coas entidades locais para a formulación e tramitación do planeamento urbanístico e a súa xestión e execución. Así mesmo, correspóndelle a asistencia e coordinación aos concellos en relación cos expedientes das subvencións que, en materia de planeamento, se tramiten na consellería.

Tamén asume unha labor de fomento para que os concellos teñan os documentos de planeamento municipal adaptados a lexislación vixente e ás características particulares previstas para o seu desenvolvemento urbanístico. Neste sentido, cabe salientar as ordes de axudas e convenios de colaboración coas entidades locais para formulación do planeamento urbanístico.

IX. O Concello de Bande ten atribuída a competencia para formular, tramitar e impulsar os seus plans especiais, en virtude da Lei 2/2016, do 10 de febreiro, do solo de Galicia.

X. A Vicepresidencia Segunda e Consellería de Medio Ambiente, Territorio e Vivenda considera axeitado colaborar na redacción dun plan especial de infraestruturas e dotacións na zona termal do Concello de Bande e para iso contribuirá cunha achega económica de de dezaioito mil oitenta e nove euros con cincuenta céntimos (18.089,50 €), IVE engadido, equivalente ao 100% do custo de redacción do plan.

A dita achega, ten que realizarse a través do Concello de Bande, xa que esta institución é a mais axeitada para o cumprimento dos obxectivos previstos. Por outra banda, nos orzamentos existe crédito adecuado e suficiente para o financiamento da actuación.

XI. O proceso de formulación do plan obxecto de axuda debe realizarse coordinadamente entre ambas as dúas Administracións asinantes, a través da colaboración na elaboración do instrumento de planeamento e da coordinación no exercicio das súas competencias respectivas, considerando as singulares circunstancias que, por motivos legais, concorren na redacción e tramitación do documento, ao



tratarse dun procedemento especialmente complexo.

Polo exposto, a Vicepresidencia Segunda e Consellería de Medio Ambiente, Territorio e Vivenda, no exercicio das súas competencias, e o Concello de Bande, no exercicio das que lle atribúe a súa lexislación específica, manifestan a súa vontade de formalizar unha colaboración, para abordar a elaboración dun plan especial de infraestruturas e dotacións na zona termal, a través dun convenio que se estrutura nas seguintes

CLÁUSULAS

PRIMEIRA.- OBXECTO

O presente convenio ten por obxecto establecer as bases da colaboración e cooperación técnica e económica entre a Xunta de Galicia e o Concello de Bande para a redacción dun plan especial de infraestruturas e dotacións na zona termal.

SEGUNDA.- COMPROMISOS DA XUNTA DE GALICIA

A Xunta de Galicia, a través da Vicepresidencia Segunda e Consellería de Medio Ambiente, Territorio e Vivenda asume os seguintes compromisos:

1.- Contribuír ao financiamento das actuacións descritas na cláusula primeira, cunha achega como máximo de dezaioito mil oitenta e nove euros con cincuenta céntimos (18.089,50 €), IVE engadido, equivalente ao 100% do custo de redacción do plan, con cargo a aplicación orzamentaria 08.04.521A.760.0, código de proxecto 2015 00253, dos orzamentos xerais da Comunidade Autónoma, distribuídos nas seguintes anualidades:

Anualidade de 2023	3.617,90 €
Anualidade de 2024	7.235,80 €
Anualidade de 2025	7.235,80 €

Os aboamentos da achega efectuaranse do seguinte xeito:

1º. Tres mil seiscientos dezasete euros con noventa céntimos (3.617,90 €), logo da sinatura do contrato e entrega da metodoloxía xeral e diagnóstico socioeconómico do PEID.

2º. Sete mil douscentos trinta e cinco euros con oitenta céntimos (7.235,80 €), que se



dividirán en dous pagamentos:

- Tres mil seiscientos dezasete euros con noventa céntimos (3.617,90 €), logo da entrega do borrador do plan e do documento estratéxico para a tramitación da avaliación ambiental estratéxica.
- Tres mil seiscientos dezasete euros con noventa céntimos (3.617,90 €), logo de certificada a aprobación inicial do plan polo órgano municipal competente, así como a inserción dos anuncios de exposición pública.

3º. Sete mil douscentos trinta e cinco euros con oitenta céntimos (7.235,80 €), que se dividirán en dous pagamentos:

- Tres mil seiscientos dezasete euros con noventa céntimos (3.617,90 €), logo de certificada a aprobación provisoria do plan polo órgano municipal competente.
- Tres mil seiscientos dezasete euros con noventa céntimos (3.617,90 €), unha vez aprobado definitivamente o plan polo órgano municipal competente.

O cumprimento das fases anteriormente indicadas, acreditarase conforme ao establecido no apartado seis da cláusula terceira.

Esta achega, de acordo co disposto no artigo 40.1º, letra d) do Decreto 11/2009, declárase compatible, no seu caso, con outras achegas, axudas ou subvencións que a entidade beneficiaria destine á execución das actuacións que se describen na cláusula primeira. Non obstante, a suma total de todas elas non poderá superar o 100% do orzamento total que require a actuación. Neste caso, a axuda establecida neste convenio reducirase ata acadar o cumprimento establecido anteriormente.

2.- A consellería asumirá, ata o límite establecido no apartado 1 desta cláusula, o custo da redacción do plan, unha vez que polo concello se presenten as correspondentes certificacións de execucións dos traballos, segundo as fases establecidas na memoria técnica pola que se rexa o correspondente contrato de servizos para a redacción do plan suscrito polo Concello de Bande. Os aboamentos parciais que se efectúen, non superarán o 80% da porcentaxe subvencionable, nin excederán da anualidade correspondente ao exercicio orzamentario.

3.- A consellería resérvase o dereito de inspeccionar a execución dos traballos en calquera momento, durante a súa execución.

4.- Nomear, se fora o caso, de entre os seus funcionarios, a un grupo de traballo que dedicará unha especial atención ó desenvolvemento das actuacións establecidas neste convenio para a eficaz culminación da finalidade do mesmo.



5.- Para os efectos do previsto no artigo 27 da Lei 9/2007, do 13 de xuño, de subvencións de Galicia, autorízase ao Concello de Bande, beneficiario da subvención, para que subcontrate ata o 100% do importe dos traballos necesarios para a redacción do instrumento de planeamento obxecto do presente convenio. Tal autorización considérase concedida sen prexuízo, se é o caso, do cumprimento das previsións que establecen os números 3º e seguintes do devandito artigo 27.

TERCEIRA.- COMPROMISOS DO CONCELLO

O Concello de Bande asume as seguintes obrigas:

1. Contratar o servizo de redacción do plan especial de infraestruturas e dotacións.
2. Tramitar o plan especial de infraestruturas e dotacións, segundo o procedemento regulado na lexislación urbanística vixente, ata acadar a súa aprobación definitiva e posterior inscrición no Rexistro de Ordenación do Territorio e Planeamento Urbanístico aos efectos da súa entrada en vigor.
3. Facilitarlle o acceso a todo tipo de información, que teña relación co obxecto do presente acordo, á Vicepresidencia Segunda e Consellería de Medio Ambiente, Territorio e Vivenda.
4. Así mesmo, o Concello de Bande asume a obriga de financiar a súa conta exclusiva, se fora o caso, os posibles modificados do contrato, contratos complementarios, liquidacións e/ou revisións de prezos que se puideran producir.

Logo da adxudicación dos contratos que se celebren, para a execución das actuacións necesarias para a o cumprimento do obxecto do presente convenio, as baixas que, de ser o caso, resulten aplicaranse na proporcionalidade das achegas de cada unha das administracións que interveñen, dentro do límite orzamentario establecido na cláusula primeira.

5. Para os efectos do previsto no artigo 30.2 da Lei 9/2007, de 13 de xuño, de subvencións de Galicia, a publicación do anuncio da aprobación definitiva do plan no DOG será requisito suficiente como xustificación plena da execución dos traballos obxecto da axuda.



6. Presentar obrigatoriamente por medios electrónicos na sede electrónica da Xunta de Galicia, <https://sede.xunta.gal>, a correspondente rendición dunha conta xustificativa integrada pola documentación que se indica de seguido e que incorporará, en todo caso, a certificación da intervención ou do órgano que teña atribuídas as facultades de control da toma de razón en contabilidade e do cumprimento da finalidade para a cal foi concedida a subvención, segundo o disposto no artigo 8 do Decreto 193/2011, de 6 de outubro, polo que se regulan especialidades nas subvencións ás entidades locais galegas:

(i) Copia compulsada dos xustificantes de gasto, certificacións ou calquera outro documento con validez xurídica que permita acreditar o cumprimento da finalidade da subvención. A estes efectos, indica o artigo 3 do citado decreto, que con carácter xeral, considerárase gasto realizado cando se teña contabilizado o recoñecemento da obriga polo órgano competente do concello. Así mesmo, a entidade local beneficiaria deberá acreditar, dentro do prazo dun (1) mes contado a partir da data de recepción dos fondos da axuda, ante a Dirección Xeral de Ordenación do Territorio e Urbanismo o pagamento dos fondos ao/s contratista/s que executaron os servizos obxecto do presente acordo.

(ii) Certificación ou acto de aprobación/conformidade do órgano municipal competente; e declaración, de ser o caso, sobre a obtención doutras subvencións, axudas, ingresos ou recursos que financien as actividades subvencionadas.

A data límite de presentación da referida documentación de xustificación do gasto establécese no día 15 de decembro de cada unha das anualidades establecidas no presente convenio. Non obstante, a documentación xustificativa da aprobación definitiva do plan deberá presentarse un mes antes da finalización da vixencia do presente convenio.

Para a presentación electrónica poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>). Estes formularios só terán validez se están debidamente asinados polo representante legal da entidade correspondente ou persoa debidamente acreditada.

7. Facilitar, se fose o caso, toda a documentación que requira a Intervención xeral da Comunidade Autónoma, o Tribunal de Contas e o Consello de Contas de Galicia, no exercicio das súas funcións de fiscalización e control do destino das axudas obxecto do presente acordo.

8. Comunicarlle a Dirección Xeral de Ordenación do Territorio e Urbanismo, se fose o caso, as alteracións nas condicións tidas en conta para a concesión da axuda obxecto do



presente acordo e, en todo caso, a obtención concorrente de subvencións ou axudas outorgadas por outras administracións, entes públicos ou privados, nacionais ou internacionais aos efectos de propoñer, se procedera, á modificación das condicións establecidas neste convenio.

9. Reintegrarlle á Comunidade Autónoma, de acordo co artigo 33 da Lei 9/2007, a cantidade total ou parcial da axuda establecida neste convenio, e os xuros de demora que no seu caso correspondan dende o momento do seu pagamento, para o caso de incumprimento das condicións nel establecidas.

10. Asumir, pola súa consideración de beneficiario segundo o artigo 11 da Lei 9/2007, todas as obrigas que, para o mesmo, establece o citado artigo.

11. A concesión de axudas deste convenio queda supeditada ao cumprimento da normativa vixente. De acordo co disposto no artigo 17.3 da Lei 9/2007 e no artigo 40.1º, letra d) do Decreto 11/2009, polo que se aproba o seu regulamento, a achega económica será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou e organismos internacionais.

12. O Concello de Bande presta expresamente o seu consentimento para que se lle dea ao presente convenio a publicidade que establecen os apartados 1 e 2 do artigo 15 da Lei 1/2016, do 18 de xaneiro, de transparencia e bo goberno, na forma establecida, e nos rexistros públicos regulados no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 21 de decembro, de orzamentos xerais da Comunidade Autónoma de Galicia para o ano 2006 (DOG núm. 153 do 9 de agosto). Polo tanto, o convenio será obxecto de publicación na páxina web oficial con expresión da contía e a súa finalidade, de acordo co disposto na citada normativa.

13. Nomear, se fose o caso, de entre os seus funcionarios, a un grupo de traballo que dedicará unha especial atención ó desenvolvemento e seguimento das actuacións establecidas neste convenio e mailo seguimento dos prazos estipulados no correspondente contrato de execución.

CUARTA.- PROCEDEMENTO DE XESTIÓN

A Vicepresidencia Segunda e Consellería de Medio Ambiente, Territorio e Vivenda, a



través da Dirección Xeral de Ordenación do Territorio e Urbanismo financiará as actuacións ata un máximo de dezaoito mil oitenta e nove euros con cincuenta céntimos (18.089,50 €), IVE engadido, equivalente ao 100% do custo de redacción dun plan especial de infraestruturas e dotacións, que fará efectivos mediante transferencia bancaria ao Concello de Bande, contra a presentación por este das certificacións dos traballos executados, segundo as fases previstas no convenio. Non obstante, poderán efectuarse aboamentos parciais ata o 80% da porcentaxe subvencionada, logo da presentación das correspondentes xustificacións e o cumprimento dos requisitos definidos nos puntos (i) e (ii) do apartado 6 da cláusula terceira.

Unha vez rematados os traballos obxecto do acordo, por parte do concello deberá ser xustificado o cumprimento das condicións da execución e a consecución dos obxectivos previstos, na forma establecida nos artigos 28 e 29 da Lei 9/2007. A referida xustificación consistirá, entre outras, na certificación da intervención, ou do órgano que teña atribuídas as facultades de control, acreditando o cumprimento da finalidade para que foi outorgada.

Así mesmo, deberá presentarse un certificado expedido pola secretaría da entidade local, co visto e praxe do/a alcalde/sa relativo a aprobación polo órgano competente da conta xustificativa da subvención, segundo o previsto no artigo 10 do Decreto 193/2011, de 6 de outubro, polo que se regulan especialidades nas subvencións ás entidades locais galegas.

De conformidade co disposto no apartado 6 do artigo 28 da Lei 9/2007, se a actividade se financiara ademais de coa presente subvención con fondos propios, ou outras subvencións ou recursos, deberá acreditarse na xustificación o importe, procedencia e aplicación de tales fondos ás actividades subvencionadas. O incumprimento desta xustificación, ou a súa insuficiencia, implicará o reintegro desta axuda, nos termos fixados no artigo 33 da Lei 9/2007.

A Vicepresidencia Segunda e Consellería de Medio Ambiente, Territorio e Vivenda, a través da Dirección Xeral de Ordenación do Territorio e Urbanismo limitará, en todo caso, a súa achega económica aos límites pactados no presente convenio, polo que non asumirá os aumentos que se puideran producir.

QUINTA.- RELACIÓN LABORAL ENTRE AS PARTES

A subscrición do presente convenio non implica relación laboral, contractual ou de calquera tipo, entre os profesionais que desenvolvan as actividades e a Vicepresidencia



Segunda e Consellería de Medio Ambiente, Territorio e Vivenda, de tal xeito que non se lle poderá esixir responsabilidade ningunha, nin directa, nin subsidiaria, polos actos ou feitos ocorridos no desenvolvemento deste. En consecuencia, o concello asumirá a posición de empresario ou contratante verbo de tales profesionais, e asumirá en exclusiva as obrigas e responsabilidades legais que a normativa legal e convencional lle impón verbo destes.

SEXTA.- COMISIÓN DE SEGUIMIENTO

Para o impulso, seguimento e interpretación das accións establecidas no presente convenio crease unha comisión, que propoñerá ás partes a resolución das controversias que resulten respecto da súa execución, integrada por catro membros, dous por cada unha das partes asinantes do presente documento. Pola Vicepresidencia Segunda e Consellería de Medio Ambiente, Territorio e Vivenda formarán parte da mesma, as persoas que ocupen a Dirección Xeral de Ordenación do Territorio e Urbanismo ou persoa en quen delegue, e a Subdirección Xeral de Urbanismo. Polo Concello de Bande a comisión integraran a persoa que ocupe a alcaldía ou persoa en quen delegue, e o concelleiro/a responsable da área de urbanismo.

SÉTIMA.- OBRIGAS TRIBUTARIAS E DE ORDE SOCIAL

En aplicación do establecido no artigo 11 f) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a entidade local aportará, con carácter previo á sinatura do presente acordo e tamén, xunto coa documentación xustificativa que dea lugar aos pagamentos previstos na cláusula segunda, a oportuna declaración responsable de estar ao día no cumprimento das obrigas tributarias e fronte á Seguridade Social e de non ter pendente de pagamento ningunha outra débeda coa Administración Pública da Comunidade Autónoma.

Así mesmo, en virtude do disposto no artigo 4 do Decreto 193/2011 do 6 de outubro, polo que se regulan especialidades nas subvencións ás entidades locais galegas, será requisito para a concesión de subvencións que as entidades locais cumprisen o deber de remisión ao Consello de Contas das contas xerais de cada exercicio.

OITAVA.- PUBLICIDADE

A sinatura do presente convenio suporá o consentimento expreso das partes asinantes



para incluír e facer públicos os datos persoais que consten no convenio, e mailo resto de especificacións contidas no mesmo, de conformidade co artigo 15 da Lei 1/2016, do 18 de xaneiro, de transparencia e bo goberno (DOG núm. 30 do 15 de febreiro) e o Decreto 126/2006, do 20 de xullo, polo que se regula o rexistro de convenios da Xunta de Galicia (DOG núm. 149 do 3 de agosto).

NOVENA.- PROTECCIÓN DE DATOS DE CARÁCTER PERSOAL

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), da Lei Orgánica 3/2018, de 5 de decembro, de protección de datos persoais e garantía dos dereitos dixitais, e demais normativa vixente de aplicación en cada momento en materia de protección de datos.

DÉCIMA.- RESOLUCIÓN

Serán causas de resolución deste acordo as seguintes:

- O transcurso do prazo de vixencia do acordo.
- O acordo unánime de todos os asinantes.
- O incumprimento das obrigas e compromisos asumidos por parte dalgúns dos asinantes.

Neste caso, calquera das partes poderá notificar á parte incumplidora un requirimento para que se cumpra nun determinado prazo coas obrigas ou compromisos que se consideren incumplidos. Este requirimento será comunicado ao responsable do mecanismo de seguimento, vixilancia e control da execución determinado na cláusula sexta, e ás demais partes asinantes.

Se transcorrido o prazo indicado no requirimento persiste o incumprimento, a parte que o dirixiu notificará ás partes asinantes a concorrencia da causa de resolución, e entenderase resolto o convenio. A extinción do convenio por esta causa, poderá conlevar o pago dunha indemnización polos prexuízos causados derivados de actuacións xa executadas ou como consecuencia doutras actuacións que teñan que asumir debido ao referido incumprimento.

- Por decisión xudicial declaratoria da nulidade do acordo.
- A imposibilidade sobrevida de cumprimento do obxecto do acordo.



Non obstante, se cando concorre calquera destas causas de resolución existen actuacións en curso de execución, as partes, a proposta da comisión de seguimento, vixilancia e control deste acordo, poderán acordar a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación das mesmas.

DÉCIMO PRIMEIRA.- MODIFICACIÓNS

As modificacións formalizaranse mediante *addenda* cos mesmos requisitos e condicións para a aprobación do acordo, agás aquelas modificacións de carácter técnico aprobadas polo órgano de contratación de acordo coa normativa de contratos administrativos que non impliquen a superación do importe máximo reflectido na cláusula segunda do convenio nin o incremento do número de anualidades orzamentarias, consonte o disposto no artigo 46. Dous da Lei 6/2022, do 27 de decembro, de orzamentos xerais da Comunidade Autónoma para o ano 2023.

DÉCIMO SEGUNDA.- VIXENCIA DO CONVENIO

O presente convenio producirá efectos a partir da data da súa sinatura e estará vixente durante tres anos. Porén, as obrigas económicas derivadas do convenio se circunscriben ás anualidades 2023-2025, sen prexuízo de que ambas as partes acorden unánimemente unha prórroga por un período máximo de tres anos adicionais en calquera momento antes da finalización do prazo de vixencia, en cumprimento das previsións recollidas no artigo 49. h) da Lei 40/2015.

DÉCIMO TERCEIRA.- NATUREZA, LEXISLACIÓN APLICABLE, INTERPRETACIÓN E INCUMPRIMENTO

1. Este convenio de colaboración ten natureza administrativa, correspondéndolle en último término a resolución das cuestións que poidan xurdir sobre a súa interpretación, execución e cumprimento á Vicepresidencia Segunda e Consellería de Medio Ambiente, Territorio e Vivenda. A xurisdición competente para resolver as cuestión litixiosas que poidan xurdir é a contencioso-administrativa.

2. Para o non previsto no presente convenio, resultará de aplicación a Lei 9/2007, do 13 de xuño, de subvencións de Galicia e o seu Regulamento, aprobado polo Decreto 11/2009, do 8 de xuño, e o Decreto 193/2011, de 6 de outubro, polo que se regulan especialidades nas subvencións ás entidades locais galegas.



3. O incumprimento de calquera das cláusulas do presente convenio constituirá causa suficiente de resolución do mesmo.

Este convenio obriga ao cumprimento do expresamente pactado, someténdose ambas as partes ao acordado en todas as estipulacións.

E para que así conste, de conformidade con canto antecede, no exercicio das atribucións de que son titulares os asinantes, e obrigando con iso ás Administracións que representan, asinan dixitalmente o presente convenio na data sinalada.

Pola Xunta de Galicia,
A vicepresidenta segunda e conselleira de
Medio Ambiente, Territorio e Vivenda

Polo Concello de Bande,
A alcaldesa-presidenta

Ángeles Vázquez Mejuto

Sandra Quintas Vázquez

